

„Pogled preko ramena“ je rubrika u Biltenu kojom podsjećamo na neka dešavanja između dva broja, ili posljednjih nekoliko mjeseci, a koji su objavljeni na Portalu *Reprezent*. Ovoga puta izbor je malo teži jer se u minulom vremenu dešavao poprilično toga što zavrijeđuje pažnju čitalaca.

Naravno, u prvom planu su migranti-izbjeglice a svakako je tu bilo hapšenje a potom i ekspresno oslobađanje generala AR BiH, Atifa Dudakovića, inače komandanta u međubosnjačkom sukobu na prostorima Bosanske Krajine - današnjeg USK-a.

U nastavku podsjećamo još na neke od događaja koji zavrijeđuju pažnju



Općinsko vijeće odbilo Inicijativu o ukidanju „bijelog kruha“

Krajem marta održana je 18. redovna sjednica Općinskog vijeća Velika Kladaša kojoj su prisustvovala 22 od 28 vijećnika i na kojoj su, između ostalog, raspravljali i o prijedlogu da se ukine tzv. „bijeli kruh“ - kojeg bi, kako je kazao predlagatelj Dinko Ljubijankić, koristilo devet savjetnika ili ukupno 11 osoba nakon prestanka mandata, a što bi poreske obveznike koštalo 250 hiljada KM. Inicijativa Dinka Ljubijankića nije prihvaćena od strane vijećnika Laburističke stranke koji su bili protiv. Zatraženo pojedinačno glasanje je u konačnici potvrdilo već pomenuto izjašnjanje.




Treća svjetska medalja u karateu stigla u Veliku Kladašu

Obistinila se najava iz Karate kluba „Regeneracija“ Velika Kladaša da će ova godina biti posebno pamćena po rezultatima članova ovog najtrofejnijeg sportskog kolektiva u Velikoj Kladaši. Osvojene su već tri medalje svjetske relevancije a sa svih turnira u prvoj polovini godine uglavnom su se vraćali kao sveukupni pobjednici. Da se posebno istaknu zavrijeđuju Tarik Salkić i Ema Nadarević, a o njihovim i uspjesima KK „Regeneracija“ možete više pronaći na Portalu *Reprezent*.

Migranti u Velikoj Kladaši

O problemu migranata u Velikoj Kladaši i Unsko-sanskom kantonu Redakcija *Reprezent*-a je pravovremeno i sadržajno izvještavala javnost, a posebno su bili kvalitetni i sadržajni prilozi prof. dr. Nedžada Bašića i analitičara-publiciste Rame Hirkića.

S obzirom na dugotrajn a uvijek aktuelan problem u kojem se lokalna vlast ne snalazi, ovi prilozi su često sadržavali kritička promišljanja i osude odnosa prema migrantima i njihovim potrebama a u kontekstu činjenice da su oni tu i da još uvijek nema drugog rješenja. (Više priloga pogledati na Portalu)



Apel Vijeću ministara BiH: Sve više izbjeglica u Velikoj Kladaši

Redakcija *Reprezenta* sa svojim prijateljima i senzibilnim građanima Velike Kladaša upućuje Javni apel Vijeću ministara BiH povodom sve složenije imigrantske krize u Velikoj Kladaši.

Poštovani, pretpostavljamo, možda i naivno, da vam je poznata situacija sa imigrantima u Velikoj Kladaši. Znamo za vaše nadležnosti i odgovornosti u oblasti imigrantskih poslova. Velika Kladaša je mala Čaršija u kojoj se sve vidi i zna! Kladašćani su od pamtivijeka nadaleko poznati kao gostoljubiva, dostojanstvena i solidarna čeljad. Već duže od dva mjeseca prilično uspješno se nosimo sa humanitarnim potrebama imigranata kojih je svakim danom sve više. Posebno smo senzibilni prema ženama sa djecom poučeni vlastitim izbjegličkim golgotama 1994/95. Velika Kladaša ima perfektno smještajne kapacitete za 100-njak osoba u Dispanzeru u Polju koji je u 90% vlasništvu Vlade FBiH, a više od 20 godina je van upotrebe. Sa skromnim ulaganjima i većim zalaganjem Kladašćana i imigranata isti se može u primjermom roku staviti u funkciju. Molimo izvršite vaše zakonske obaveze mobilizirajući nadležne organe i resurse oko imigranata i pomozite Kladašćanima da lakše i uspješnije održe svoje tradicionalne ljudske vrijednosti.


(Velika Kladaša, 09. 04. 2018. godine)

Reportaža sa 16. Krajiškog teferića

Početkom augusta u Velikoj Kladaši je, po drugi puta uzastopno, održana tradicionalna manifestacija „Krajiški teferić“. Sa ovog događaja koji je bio sve više nego teferić, donosimo video reportažu u kojoj se podsjeća da muzički koncert Šabana Šaulića, uz učesce Merse Miljković i Hasiba Murtića te dva KUD-a nisu niti mogu biti obilježja a pogotovo ne i jedini sadržaji teferića koji ima svoja pravila održavanja a koje su organizatori, po drugi puta uzastopno zanemarili, bolje reći pogazili te teferić pretvorili u koncerte muzičkih zvijezda a čiji veliki račun plaćaju poreski obveznici.


Kladašćani Draganu, Brenu i Šabana častili sa oko 45.000 €ura

Velika Kladaša se posljednjih dana jula i nekoliko prvih dana augusta mogla hvaliti da živi u kraljevskom okruženju jer su je ophodile kraljice i kralj narodne muzike. Prvo je Kladašćanima dušu razgalila a džepove ispraznila Dragana Mirković, a potom i Lepa Brena da bi začinio kralj Šaban Šaulić. Sve troje je za po nekoliko sati druženja i pjevanja iz Velike Kladaše odnijelo oko 45.000 €ura čiji se efekti po Kladašćane baš po ničemu ne osjećaju. Osim po selfi fotografijama!



Najveća ikad zabilježena poplava u naselju Poljice

U drugoj polovini marta mještani Poljica kod Vrnograča osvanuli su opkoljeni vodom koje u takvim razmjerima ni-kad do tada nije bilo. Ovakvo stanje prouzrokovao je čovjek, dakle ljudski faktor, o čemu je objavljena video reportaža 20. marta 2018. godine



Pametne klupe u gradu (to više nisu)

Uže gradsko područje Velike Kladaše sredinom aprila bilo pokriveno besplatnim bežičnim internetom a nešto kasnije i pametnim solarnim klupama koje su postavljene na dvije atraktivne lokacije, u parku i kod kružnog toka.

Sve je lijepo izgledalo jer je to prvi takav slučaj u USK-u ali (pre)kratko je trajalo, jer ove usluge za građane nisu više u funkciji. Razlog poznat ali nezvaničan – uskraćena mogućnost da se istima koriste migranti u gradu.